

ME HYE ASE WO NYANKOPON NE DZIN MU, ODOMFO, MBOBORHUFO NO.

Fida Nyamesemka: Esusuowketseaba 3, 2013.
(Friday sermon – 3rd May, 2013 – Fante Translation)

NYANKOPON HO NHUNII NA KORTSEE A ALLAH YE.

O! Hom nkorɔfo a hom agye edzi! Hom nsuro Allah na ɔkra biara nhwe dza ɔdze ridzi n'enyim ama akyerɛ no kwan. Na hom nsuro Allah; Ampaara de Allah nyim dza hom ye nyinara yie.

Na mma hom nnye de nkorɔfo no a hon were fiir Allah no, ntsi Omaa hon were fiir hon ankasa hon ho. Wonyinom nye etuatsewfo no (59:19-20).

Nyankopon aye Taqwa (tseneneeye) gyedzinyi ne gyinabew tsitsir. Kuran Kronkron mu nsempow pii ma mbransem dodowara dze suo iyi mu anaade osi no gyina. Kuran afre hon a wodzi dem mbransem yi ekyir de Muttaqi (tseneneefo) na abo hon a wommfa nnko ndzeyee mu no koko wohon ewie ho.

Ebenadze nye Taqwa? N'ase tseabaa de mbre Kuran Kronkron akyerɛ nye de ebema Nyankopon ho enyigye edzi adontsen wo biribiara do na ehu Nyankopon de Oye Kor na biribiara nnyi ho a wodze to No ho na Ono nye tum nyinara ne farbaa. Taqwa nye ibedzi dza Nyankopon pe nyinara do na se epe de inya N'enyigye no so a, eye N'abodze hon apedze.

Anohoba Messiah (ANN) no kyerɛew de:

Oda edzi de,de mbre w'adwen boko Otumfo Nyankopon Ne nhyehyee do no, edzi ho nhyehyee nyinara do no, na edze nyimpadua ne mfafakuwa na nsatseaba, ndzemba ebien ebien tse de enyiwa na asowa, nsa na nan na dza okoka ho a yehu na wodze dzi dwuma; na ndzemba bi so a wowo nsumaamu tse de hen adwen na dza oma yeda hen su edzi; iynom wo de yedze dzi dwuma wo ne mber pa mu anaaso ye sanko hon dwumadzi wo ber a onnye mu; na woboo hen koko wo ndzebon a onnda edzi papa ho; na yedwen hen fefo hon eyiedzi ho; iyi nye kwan a yebema hen sunsum mu ahoofew edzi mu [Brahin-e-Ahmadiyya, Part V, Ruhani Khaza'in, vol. 21, pp. 209. Essence of Islam Vol. II p.348).

Dem gyinabew yi na Anohoba Messiah (ANN) kyerɛ mu pefee kyerɛ hen na iyi so na n'enyi da de yebeye. Fida kakra a etwa mu ko no Hadhrat Khalifatul Masih twee hen adwen gyinaa de Jama'at dzibewdzifo beedzi hen nhyehyee na mbra a ofa no gyedzi ho do. Nde so asempow yi gyee nkyerekyeremu bio. Ahmadiyyafo hon tsir aye yie de hon a wogyee dzi wo mber yi mu no, hon na wotwe hon adwen egyina Nyankopon ho yie. Oye Anohoba Messiah (ANN) n'enyimpa de wakodo akyerɛ hen anamon kwan no a wonam do nya gyinabew a okron no a otwe nyimpa ko Nyankopon nkyen no. Nokwar kotoo de ankorankor biara na mpenpendo a owoo wotwe mu, mbre osi to adze dzin na tsir mu adzehu mu.

Dem ntsi nna woahe de obiara wo de obo mbodzen biara a obotum na opon anohoba a o'abo ama Nyankopon no. Se gyedzinyi bo mbodzen wo iyi ho a, ono nna odzi Taqwa

nhyehyee do. W’ahye no p’ep’ep’ee de edze wo nsa, w’anan, w’asowa na w’enyiwa bedzi dwwumapa, na o’nyehye de nnkeyedza w’abra. Nhye de yedze nsatseaba na hen mfefekukuwa bedzi dwuma aboa nkor’fo hon eyiedzi nko. Pii wo ho a wonnye mfefekukuwa binom nnyi nkitahodzi biara na iynom nnye mfaso anaa onnhaw nyimpa biara. Se dem asem yebo ho mpepew a yehu de nyimpa biara noara na odua ndzeyee bi do dze yieye anaa ohaw ba noara no do.

Hwe Nyankopon ama hon kwan de wonye anaa wonnyi no akwa. Se eye dza w’abra wo no a, nyimpa fi mpenpendo no a Nyankopon ahyehye ato ho no na otow fom ho. Se annye dza w’ahye de wonnye a, nyimpa fi dza Nyankopon aka de wonnye no. Dem no, de ereye dza otsia Nyankopon Ne nhyehye no anaa erennye dza Nyankopon ahyehye no, nyinara bu Nyankopon Ne mpenpendo no na oma onye Taqwa ntamu twe. De mbre owo na Taqwa ntamu kwan rewar no demara so na ehwe Abonsam n’anan do. Dem ntsi na Anohoba Messiah (ANN) no kaa de, nnye de gyedzinyi beyi dza w’abra no nko eso owo de aber biara ohu Abonsam no nsumaamu ntuhyedo no. Se ihu no dem a oma itwitwa gye wo ho fi Abonsam ne nsumaamu ntuhyedo a onam akwan soronko do ye no. Abefo mfi pii wo ho a odze ohaw ba. De wodze bedzi dwuma ma eyiedzi aba no, ot’ofabi a wodze dzi dwuma wo akwan bi mu a odze Satan no ntuhyedo ba. Wotwe binom fi Nyankopon No nsomee ho ma odze ose ba brapa mu. Nkor’fo hwe no enyiwa do de oye asem a ofa no obi noara noho; oye ebenadze de se obi botow kyakya anaa ohwe anadwe sene (film) wo “**internet**” anaa **TV** do. Anaaso ndzeyee pii wo ho a nkor’fo ye a onndzi mu. Wodwen de obiara nnyi de oye biribiara wo ho osiande onndzi obiara ewu pokyee. Mbom, ndzemba a wonye Nyankopon No kwan bo ebira no otwe obi fi Nyankopon No som ho; wotwe obi fi Nyankopon N’apedze ho demara so na otwe obi fi dza oye de ebeye ama nyimpa ho.

Nsa, kyakyatow, mfonyin bon a woyi no wo “**internet**” do, anyenkofa a onndzi mu wo dem aman yi mu yi ma awar pii gu. Wodze mbabun fa kwan bon do, mpo wotwe hon fi gyedzi a okyer de Nyankopon wo ho ho, na iyi ma woye asokyewfo wo dom mu. Nyankopon esi no p de obiara ne nsatseaba no su na n’adwen wo de odze dzi dwuma de mbre Nyankopon ahye wo ne mber do ma iyi ma nyimpa tu kafe wo Taqwa mu. Kuran mu nsem a yekenkan ahyese no ka de enya agye edzi ewie no, owo de edze Taqwa ye wodze. Wiadze yi mu enyigyedze na afefedze nnyi de oye biribi wo w’enyi do. Owo de nyimpa hu dza o’aye dze rohwehwe Nyankopon enyigye osiande iynom na yebohu no wo wiadze kor no mu, na wiadze afefedze, ahot na enyigyedze beka ha ara. Nyimpa wo de oker noho; bon no ndwow wo Nyimpa a onnhwe yie na no were fir Nyankopon mu. Se nyimpa pe nhyira a onnyi ewie a omfa Nyankopon No kwan do.

Nsempow ebien a yekenkaan ahyese no, ma odzi kan no ka Kuran mu nsem a wokenkan wo Nikah (awar) ase. Otwe adwen gyina obra a wobonndaamba onye awow ntoatoado do na oma ahotsewee kron osiande mbofra ahotseweefo ye Nyankopon N’enyigye kwan. Mbofra ahotseweefo ndon hon ewie ngo nko, wokron hon awofon hon gyinabew wo Ndakwamba onam asor a woye ma hon ntsi. Nyankopon ka no wo ha de owo de yekaa ber a woregye awar no de wiadze yi mu afefedze, ahot na enyigye ye adze a onkyer. Awar na

wiadze korye ye adze a onnkyer. Dza oye enyigye a wotum nya no wiadze yi mu na n'aba no ma enyigye kor no mu. Nyankopon ka no mpen pii de yengyina pintsinn wo Taqwa mu na yenye ndzeyee a obema woadon hen ngo wo wiadze yi mu onye ndakwamba no so mu na yekaa de Onyim biribiara. Hen ndzeyee, de osuara o, de no ho nnhia papa biara o, worubu ho nkontaa. Ohia papaapa de yebotutu hen anamon wo ahweyie mu.

Anohoba Messiah (ANN) kaa no wo nhyiamu bi ase de Islam abrabo gye owu naaso obi a obegye Islam ato mu no nna ewie no onya nkwa. Hadith aka de, binom hon adwen ye hon de wiadze ahonya ye ahenman mu kansa otse de ogya amandzehu mpo a. Ahotseweefo gye ohaw to hon do wo Nyame kwan mu na iyi na oye aheman a odzi mu. Ekyingye biara nnyi ho de wiadze yi ye mber kumaabi na obiara so bosu owu ahwe. Mber bi ba a enuanom, anyenkofo na adofu nyinara hon ntamu tsetsew. Enyidze a onnfa kwan mu nyinara beye wen. Ahotu pa na enyigye mapa biara nnyi ho a okwetsir tseneneeye. Se obi ridzi tsenenee ekyir a otse de onom bowen kuraba. "Nyankopon dze enyigye pa nyinara ama atseneneefo. Na obi a obosuro Nyankopon No, Obue kwan ma no, na oma no yiedzi fi bea a n'enyi nda" (65:3-4). Dem ntsi yiedzi n'esumasem nye tseneneeye. Dem ntsi se yerehwehwe tseneneeye a, mma yemmfa ntoto anan mu. Se obi ye tseneneenyi a, dza obisa biara ne nsa ka. Nyankopon ye Mboborhufo, Odomfo, dem ntsi hwehwe tsenenee na Odze biribiara bema wo (Malfuzat, Vol. V, pp. 106 – 107).

Ampaara de se obi ye tseneneenyi a, onya Nyame N'adom nyinara. Owo de obiara sese n'abrabo mu hwe de oridzi suae a osuae de obema ne gyedzi ehia no akyen biribiara wo wiadze yi mu na obefa tseneneekwan do na wocama ne kasa na ne ndzeyee nyinara aye kor. Anohoba Messiah (ANN) no ka de tsenenee no kwan ye dzen na obi a obotum afa do ara nye obi a obedzi Nyankopon Ne mbrasem nyinara do de mbre otse na oye dza Nyame pe na onndzi onoara n'apedze do. Obiara ronntum nnya hwee mfi mpetu bra mu. Nyame N'adom na ohia. Gyede obi bo mpaa na obo noho mbodzen ansaana oeenya adom. Nyankopon Noara ahye de owo de yebu mpaa na yeye edwuma dzen Malfuzat, Vol. VI, p. 227).

Anhohoba Messiah (ANN) no ka de, hom nhwehwe tseneneeye osiande Nyankopon N'adom na Ne nhyira dzi tseneneeye ekyir na tseneneenyi nya bambu fi wiadze yi no mu atowerenkyem ho. Nyame N'adom ntsi yenya Nyame Ne nhyira pii de yeye Okuw. Na yehu mbre Nyankopon oyi hen fi atamfo hon tsirmupow ahorow mu. Hen kuw yi mu mba pii wo ho a wodzi tseneneeye do na wohwehwe Nyankopon N'enyigye. Owo de yebu mbodzen de yeaye Bai'at ewie yi, yenya tsenenee suban a ono na oma Muslimnyi dzi yie. Iyi ara so na Anohoba Messiah (ANN) no rohwehwe efi hen nkyen. Hom mma yenkaakaa Nyankopon wo ber nyinara mu. Mpo Nyankopon Noara aka de, Oronnhwer hwee se yeannkaakaa No a, mbom yebu hen enyi gu No do a, oko tsia hen ara. Hon a hon were fir Nyankopon No ennya gyedzi a no mu ye dzen na hon were fir de da kor wobehyia No.

Dza osi nye de hon abrabo pa na hon sunsum mu ahodzen do tsew ber nyinara. Hon dze wodwen de wiadze hia kyen ndakwamba. Dza oboto hon wo hon wu ekyir no, Nyankopon nkotsee na Onyim. Na hon a wodo wiadze yi no wonnya asomdwee wo hon abrabo yi mu na yehu nkorofu a se wohwer agyapadze kumaabi mpo a wonntum nnye hon ho

hwee. Nyankopon aka de, se eka de ewo gyedzi na ennya nyamesuro na enndzi Nyankopon Ne nhyehyee do a, nna wo gyedzi nnsi pi. Wo dem gyinabew yi mu no ammba mboden de renya nsakyer pa a, nna wo wiadze yi mu abraho no ato kyew. Nnye de wobefre dem nyimpa yi “Fasiq” (otuatsewnyi) nso osan so ye obi a obu mbra do osiande Fasiq so gyina ho ma nyia wabohoboda de obedzi Shariah (Islam mbra) do, na woebu mbra no bi do anaa ne nyinara mpo do.

Kuran ne kyefa bi ka kyere hen de obi a oye bonyiaye ma Nyankopon N’adom no, woyi no fi setie ase na Fasiq na onya suban bon. Se obi ye Bai’at na obo anohoboda de obema ne gyedzi ehia no akyen wiadze yi mu biribiara a, nna owo de oma n’enyi ko mbransem nyinara do na mma ommbu n’enyi nngu biara do wo kwan biara do. Oye Nyame N’adom de O’ama Ahmadiyyafo enya adom pii. Oye Anohoba Messiah (ANN) no nhira a onyaa a odze rotoa Nkonhyenyi (NNN) n’edwuma no do na yeranya ho mfaso. Ampaara de nkonhye ye adom kese a Muslimfo binom regye ho kyim na woye ho asor bo mpaa eso wosan pow. Hen tsir aye yie de yanya dem adom yi na yeka hon a wonya no mu nhira no bi. Yebenya ho mfaso yie wo ber a yebodzi nhyehyee a Anohoba Messiah (ANN) aye ama hen no do. Ono yebeye de hon a wado esuko wo enyimbugudo mu na watwetwe Nyankopon N’ebufuw hyew.

Anohoba Messiah (ANN) baa begyinaa no wura Nkonhyenyi Kronkon Muhammad (NNN) n’anan mu de odze Nyankopon No Korye robobo adze. Anohoba Messiah (ANN) akyerew de; Nyankopon No korye (Tawheed) nnye de obi beka Laa Ilaaha Illallah nkotsee wo ber a owo abosom mpempem wo n’akoma mu. Ampaara de obiara a odze no ho to onora no do de onam ndaadaa kwan do, anaa oye nhyehyee de oye Nyame anaa odze no ho to obi no do de mbre nyimpa no ye Nyankopon no, Nyankopon de nyimpa yi ye mbataho wo dem akwan ahorow nyinara mu. Abosom nnye dza wodze sikamfutuw, dwete anaa mbobaa aye na wosom hon, mbom biribiara a se oye kasa anaa ndzeyee a wodze Nyankopon No gyinabew ma no no, ye bosom wo Nyankopon N’enyi do (Siraj-ud-Din ‘Isa’ike Char SawalonkaJawab, RuhaniKhaza’in, Vol. 12, pp. 349).

Nyankopon No korye a oye nokwar trodoo a Nyankopon aye no akyedze na nkwagye gyina do nye de begye edzi de Nyankopon nnyi okahofa biara; de oye bosom anaa nyimpa anaa ewia anaa bosom (Moon) anaade oye nyimpa ne pe, anaa obi no nyansakrono anaa nkontomposem na begye ato mu de obiara nnyi ho a owo tum kyen No anaa befa obi de ono na okye enyimnyam anaa oma enyinguase, anaa befa obiara bofo na edze wo do na wo som bema no, na beye ahobrase na edze wo were behye no mu na benya suro ama no. Nkabomu rennhye ma gyede dem ahyensew ebiasa yi a otoatoa do wo ha yi. Odzi kan, Honam Nkabomu wo ho, okyere de, edwen wiadze nyinara ho de onnyi ho a Ono mbom wo h, na ehu no de oye adze a owu na oye biribi a onnyi mudzi. Oto do ebien, Mbambaye Nkabomu, okyere de dem “Rububiyya” na Nyametsir no hye No Suban mu na dza aka a woba nyinara de woye awowafo anaaso adoyefo no ka nhyehyee a Odze Ne nsa aye keke. Oto do ebiasa, odo, nokwardzi na etuhoakye Nkabomu, okyere de, nkefa obiara abata Nyankopon ho wo odo na som mu na edze wo were hye No nkotoo mu (Siraj-ud-Din ‘Isa’ike Char

SawalonkaJawab, RuhaniKhaza'in, Vol. 12, pp. 349-350. Essence of Islam, Vol. I. pp. 169 – 170).

Anohoba Messiah (ANN) kasae faa Taqwa ne mudzi ho de: Taqwa ne mudzi mapa ye iyi nkotsee de nyimpa no honamdua begyina de onnse hwee na ampaara de iyi ye Tawheed. De ebeyi Nyankopon esi ho de obor biribiara do ye Taqwa na iyi so Tawheed hye mu. Ketseakye Nyankopon ama yeenya dem gyinabew yi.

Hadhrat Khalifatul Masih dze too gua de akwantu da n'enyim na oserere mpaabo ama aye nhyira wo akwan nyinara mu.

Translated by: 1. Mr. Alhassan Kobina Atta-Wenchie
(Tutor in English Language, Jamiatul Mubashireen, Ghana)
2. Maulvi Alhassan Bashir Annan Sahib
(Tutor, Jamiatul Mubashireen, Ghana)

Downloaded from: www.jamiatulmubashireen.org

Contact: www.jamiatulmubashireen.org/contact-us